

Dä Lotemer Pött

van Winkels Addo

Jetzt hammer dä Salat: die Länkter hant sinne Pött om Maat, on die Lotemer kräje al wier dat, wat die Düsseldörper jekrääje hant! Joo so jeet et jo net! On wie dat so es, wenn dä eene jät Nöjes hät, dann mot dä angere dat och han. On wie die Länkter sinne Pött möt völl Buhei on Tamtam enjeweet hadde, doo hant die Lotemer wääkelang net mier röhisch schloope könne: wie kriije merh dann och sonne Pött noo Lotem? On dann wood dispetiert, on all woore se doovüür: en Lotem mot och son Deng hin. Äver woohin? Et eesch mende son janz Kloke, beej Vels am Baggerlook - hüt saare se joo "Latumer See" dovüür, domöt dat die Riike, on die, die sesch dovür halde, dohin trække könne. Och os Seniore solle doo en Residenz kriije, wenn se se betaale könne. Joo, on dann hat die Lotemer överleit, daat sonne Pöt joo och Kenger aanträkt, die dann möt dat Waater jier ens madsche dont, on schreie, wenn et am schönsde es. Ja on weil die alde Lüttsches joo sin Rouh han wolle, kann sonne Pött joo net noo Franz Schmitz sin Kull. Nää, doo hant se sesch jät angisch envalle loote. Op ens koome se doodrop, beej Mönks Karl om Hoff, doo es Platz jenoch, on Kenger könne doo och so schön schpeelee, on schreie, on madsche - äver doo sindse och wier van av jekoome, ja on woröm? Doo hander jeseit, wenn op dä Hoff, doo vaare joo al ens Trecker hin on her, on wenn beejm Trücksätte sonne Trecker ens vör dä schöne Pött kömp, dat wöd äver düer, weil dann jeet dä Trecker kapott, on weil dä Buur möt ene kapoddije Trecker nix don kann, hant se enjesenn, dat dat nix es, beej Karl om Hoff.

Dä Karl hät sesch joo rischtisch schtärk jemäk, doomöt Lotem sinne Pött kret. Äver doo motse joo vörseschtisch sin, weil die Meerbuscher modde joo doomöt enverschtange sin. On des Meerbuscher, dat es joo en eejene Zoorts van Mensche, die hant et eesch ens joo jeseit; doomöt krääje se al ens kinne Schtriit. Äver hengenoo hant se et dann so jedreet, dat eesch die Schtroot jemäkt wääde mos, eh dat dä Pött aanjevange wääde kos. Ja on dann hant se jemerkt, dat de Kass lääsch woor - noo, dat kose die joo vürher och net weete. Op eemool fällde dänne teen dusent Mark, ja on ov dä Heimatkreis net so nett sin kös on die och noch övernäame mööt. On weil merh vör Lotem joo alles dont, hammer die teen dusent Eier op os Kapp jenoome, blos doomöt Lotem sinne Pött kret.

Noo kann et joo sin, dat de Lütt meene, dat dä Pött net so fein wüür wie die Länkter dr sinne, vleets heie merh vör Drickes, Trina on Schtina e paar Lotemer Names nääme könne, vleets Kallie, oder Jiisela, oder Liiisabeth, äver dat sooch jo so noojemäkt uut, dat wollt dann doch nömmes mier.

Doo hät doch dä Kleene sinne Opa jevrocht: "Opa, wat es dann ene Pött? - "Wie, wetse dat net, ene Pött es e jroot Döppe van Schteen, möt janz völl Waater dren. On döx es doo en Jitsch dren, dat dat Waater rischtisch ene Höschde schprengt." - "Opa, beej dä Lotemer Pött hant se sesch äver fies vrdonn, doo senn esch ke jroot Döppe möt völl Waater dren." - "Ja Jöngke, dat weet esch och net, wat se sesch doobeej jedeit hant. Doo mommer ens dä Heimatkreis vroore, die weete dat janz genau, woröm dat och ene Pött es!" -

Vreut ösch marh, dat dat noch so joot jeklappt hät, on dat nömmes jät te knuure hät. Esch meen, os kann et joo ejal sin, wenn sonne Düsseldörper Professor, dä jät van Kuns vrschtonn well, wie hä ment, wenn dä nou jät te knuure hät, dat de Lütt al wier ene nöje Pött han wolle, on dat all die Dörper röm on töm all doll sind, Pödde te kriije. Äver genau so, wie dä sät, dat se all kin Ahnung hant van Kuns, könne merh saare, dä hät kin Ahnung. Lotem brukt kin Kuns op de Schtroot, äver ne rischtije Pött möt ohne Jedöons, äver möt Waater, vör te madsche on vör te schpeelee, vör Kenger on vör Mamas, on Ommas, on Oppas. Ov Vrände dat noo schön fenge oder net. Hauptaak es, die Lotemer fenge dä Pött schön on praktisch, on doo kömp et joo am Eng drop aan. On wenn die Kenger sesch ens jät drekisch maake, dann es dat jarnet schlemm, denn Dreck hält joo och wärm.

On et Schönsde es, dat dä Pött genau medde en Lotem hinjekoome es, wo die twei jroote Bullevaars van Lotem sesch de Daarestiit saare, beej Kini vör de Düür. Ja en bäättere Schtell jövt et jaarnet. On jetz könne die Lotemer wier röhisch schloope.

On et sall wal net lang düüre, do koome die Rhiindörper och aan, on wolle sinne Pött han. Ov merh dat äver noch erlääve, wää weet. Dann modde noch völl Schtroote et eesch en Oorder jemäkt wääde. Bis doohin löpt noch ärsch völl Waater dr Rhiin erav....